

Ўзбекистон Республикаси
Молия вазирлиги

№ 06/04-01-32/3953

Ўзбекистон Республикаси
Давлат солиқ қўмитаси

№12-37999

2019 йил «30» декабрь

Қорақалпоғистон Республикаси,
вилоятлар ва Тошкент шаҳар
Давлат солиқ бошқармаларига

Қорақалпоғистон Республикаси
Молия вазирлиги, вилоятлар ва
Тошкент шаҳар молия
бошқармаларига

Юридик ва жисмоний шахсларга солиқ солиш тартибига
2020 йил 1 январдан киритилаётган ўзгаришлар тўғрисида
АХБОРОТ ХАБАРИ

Ўзбекистон Республикаси Молия вазирлиги ва Давлат солиқ қўмитаси 2020 йилнинг 1 январидан бошлаб Ўзбекистон Республикаси Солиқ кодекси (янги таҳрирда) амалга киритилади. Шу муносабат билан, юридик ва жисмоний шахсларга солиқ солиш тартибига киритилган асосий ўзгаришларни маълум қиламиз.

Ўзбекистон Республикаси Солиқ кодексининг электрон нусхаси Молия вазирлигининг (www.mf.uz) ва Давлат солиқ қўмитасининг (www.soliq.uz) сайтларида жойлаштирилган.

Солиқ кодексини (янги таҳрирда) қабул қилиниши муносабати билан солиқ ҳисоботларининг янги шакллари ишлаб чиқилади. Солиқ ҳисоботи шакллари Ўзбекистон Республикаси Адлия вазирлигида ҳуқуқий экспертизадан ва давлат рўйхатидан ўтказилгандан сўнг барча солиқ тўловчиларга етказилади.

Акциз солиғи, ер солиғи, сув ресурсларидан фойдаланганлик учун солиқ ставкалари, мулкни ижарага берувчи жисмоний шахслар учун ижара тўловининг энг кам ставкалари, яқка тартибдаги тадбиркорлар учун жисмоний шахслардан олинадиган даромад солиғининг қатъий белгиланган миқдори, маҳаллий йиғимларнинг чегаравий ставкалари, автотранспорт воситаларини сотиб олинганда ва (ёки) вақтинчалик олиб кирилганда ички ишлар органларида уларни рўйхатдан ўтказганлик учун автотранспорт воситалари эгалари (фойдаланувчилари) томонидан тўланадиган йиғимлар ва хорижий давлатлар автотранспорт воситаларининг Ўзбекистон Республикаси ҳудудига

кириши ва худуддан транзит ўтиши учун йиғимлар ставкалари 2019 йил 9 декабрдаги “Ўзбекистон Республикасининг 2020 йилдаги Давлат бюджети тўғрисида”ги ЎРҚ-589-сонли Ўзбекистон Республикаси Қонуни билан тасдиқланган.

Ер солиғи бўйича 2020 йил учун солиқ ҳисоботи қишлоқ хўжалигига мўлжалланмаган ерлар қисми бўйича 2019 йилда амалдаги шакллар бўйича ер участкаси жойлашган жойидаги солиқ органларига тақдим этилади.

Мол-мулк солиғи ва сув ресурсларидан фойдаланганлик учун солиқнинг 2020 йил учун ҳисобланадиган суммаси тўғрисидаги ҳисобот 2019 йилда амалда бўлган шаклда тақдим этилади.

2019 йил учун солиқ ҳисоб-китоблари Ўзбекистон Республикаси Солиқ кодексининг янги таҳририда назарда тутилган муддатларда 2019 йилда амал қилган шакл ва тартибда тақдим этилади.

УМУМИЙ ҚОИДАЛАР

1. Ягона ижтимоий тўлов ўрнига ижтимоий солиқ, ягона солиқ тўлови ўрнига – айланмадан солиқ, қатъий белгиланган солиқ ўрнига - жисмоний шахсларнинг даромадларига, уларга қонун ҳужжатларида белгиланган тартибда илгари берилган имтиёз ва солиқни ҳисоблаш хусусиятларини сақлаб қолган ҳолда, қатъий белгиланган миқдорда солиқ жорий этилади.

2. Солиқлар ва бошқа мажбурий тўловлар бўйича имтиёзлар, шунингдек солиқлар бўйича пасайтирилган ставкалар қуйидаги муддатларда амал қилади:

Ўзбекистон Республикасининг 2007 йил 25 декабрдаги ЎРҚ-136-сонли Қонуни билан тасдиқланган Ўзбекистон Республикасининг Солиқ кодекси билан тақдим этилган ва белгиланган имтиёзлар ва ставкалар 2020 йил 1 апрелгача;

Ўзбекистон Республикаси Президенти ва Ўзбекистон Республикаси Вазирлар Маҳкамасининг қарорлари билан тақдим этилган имтиёзлар ва ставкалар, уларнинг амал қилиш муддати тугагунга қадар.

3. Солиқ кодекси таркибидан давлат божи, товарларнинг айрим турларини (алкоголли ичимликлар) сотиш ҳуқуқи учун йиғимлар бўлимлари чиқарилди, улар “Давлат божи тўғрисида” ги Ўзбекистон Республикасининг алоҳида қонунида назарда тутилади.

4. Бир марталик хусусиятдаги махсус тўловлар бўлган ер қаъридан фойдаланувчилар учун бонуслар (имзоли бонус ва тижоратбоп бонус) Солиқ кодексидан “Ер қаъри тўғрисида” ги Ўзбекистон Республикаси Қонунига ўтказилади.

5. Солиқ тўловчилар 2020 йил 1 апрелгача 2020 йил учун солиқ солиш мақсадлари учун ҳисоб сиёсатини ишлаб чиқишлари шарт. Солиқ мақсадлари

учун ҳисоб-китоб сиёсати солиқ тўловчи томонидан мустақил равишда ихтиёрий шаклда белгиланади ва раҳбарнинг буйруғи билан тасдиқланади.

6. Қуйидагилар учун махсус солиқ режимлари бекор қилинди:

а) бозорлар учун, уларни умумбелгиланган солиқларни тўлашга ўтказган ҳолда. 2020 йил 1 январдан бошлаб бозорлар аввалги солиқ тўлаш тартиби (даромаднинг 50 фоизи) ўрнига қуйидагиларни тўлайди:

умумдавлат солиқларини (агар реализация ҳажми 2019 йилда 1 миллиард сўмдан ошган бўлса) - юридик шахслардан олинадиган ер солиғи, юридик шахсларнинг мол-мулкига солинадиган солиқ, сув ресурсларидан фойдаланганлик учун солиқ, қўшилган қиймат солиғи ва 20 фоизли оширилган ставкада фойда солиғини;

айланмадан солиқни (реализация ҳажми 2019 йилда 1 млрд. сўмдан кам бўлганда), шунингдек юридик шахслардан олинадиган ер солиғи, юридик шахсларнинг мол-мулк солиғи ва сув ресурсларидан фойдаланганлик учун солиқни;

б) концерт-томоша фаолияти билан шуғулланувчи жисмоний шахслар учун, уларга жисмоний шахслардан даромад солиғини тўлашни киритган ҳолда.

Концерт-томоша фаолияти билан шуғулланувчи юридик шахслар учун айланмадан солиқ (реализация ҳажми 2019 йилда 1 млрд. сўмдан кам бўлганда) ёки умумбелгиланган тартибда тўланадиган солиқлар (реализация ҳажми 2019 йилда 1 млрд. сўмдан ошганда) киритилади.

Шу билан бирга, ушбу фаолиятни амалга ошириш ҳуқуқи учун олинадиган давлат божининг миқдори деярли 4 баравар камайтирилди;

в) қишлоқ хўжалиги ишлаб чиқарувчилари учун, уларни умумбелгиланган солиқ тўлашга ёки айланмадан солиқ тўлашга ўтказиш билан. Шу билан бирга, ушбу тоифадаги солиқ тўловчилар учун фойда солиғининг ноль ставкаси белгиланади, қишлоқ хўжалиги маҳсулотларини сақлаш учун ишлатиладиган мол-мулк қисми бўйича мол-мулк солиғидан ва томчилатиб суғориш тизими жорий этилган ерлар учун ер солиғидан имтиёзлар сақлаб қолинади.

7. Якка тартибдаги тадбиркорлар учун декларация асосида жисмоний шахслардан олинадиган даромад солиғини тўлашни ёки 2020 йилдан бошлаб ўртача 25 фоизгача пасайтириладиган қатъий белгиланган миқдорда солиқ тўлашни танлаш ҳуқуқи берилади. Декларация асосида ёки қатъий белгиланган миқдорда солиқни танлаш ва тўлашнинг батафсил тартиби ушбу қўшма хатнинг 3.9-бандида келтирилган.

8. Ўзбекистон Республикаси Солиқ кодексининг янги таҳририда ҳисобварақ-фактуралар коида тариқасида электрон кўринишда расмийлаштирилиши белгиланган.

2020 йил 1 январдан бошлаб товарларни (хизматларни) сотишда хўжалик юритувчи субъектлар ҳисобварақ-фактураларни электрон шаклда тақдим этиши ва қабул қилиши шарт. Солиқ тўловчилар электрон ҳисобварақ-фактуралар операторини ўз хоҳишларига кўра танлашлари мумкин.

Шу билан бирга, электрон ҳисобварақ-фактураларнинг алоҳида операторлари 2020 йил бошида ўз хизматларини бепул тақдим этадилар.

Кўп сонли солиқ тўловчиларни электрон ҳисоб операторларига улаш зарурати туфайли, 2020 йил 1 июлга қадар солиқ органлари белгиланган тартибни бузганлик учун жавобгарлик чораларини қўлламайдилар.

Давлат солиқ қўмитаси томонидан Ўзбекистон Республикаси Молия вазирлиги билан биргаликда ҳисобварақ-фактураларни расмийлаштиришнинг, шу жумладан уларни қоғозда расмийлаштириш мумкин бўлган ҳолатларни ҳисобга олган ҳолда, янги тартиби етказилади. Ҳисобварақ-фактураларни тақдим этиш тартиби ҳуқуқий экспертизадан ва давлат рўйхатидан ўтказилганига қадар солиқ тўловчилар 2019 йилда амалда бўлган тартибни қўллашлари керак (рўйхат рақами 3126, 2019 йил 21 январь).

Шунга ўхшаш тартиб онлайн касса аппаратларидан фойдаланишда ҳам қўлланилади.

II. Солиқ маъмуриятчилиги масалалари.

1. Солиқ органларининг солиқ тўловчининг солиқ қарзини ундиришни унинг дебиторидан олинадиган суммага қаратиш ҳуқуқи бекор қилинади.

2. Солиқ органларининг ортиқча тўланган ёки ортиқча ундирилган солиқларни ўз вақтида қайтариш учун жавобгарлиги кучайтирилди. Ортиқча ундирилган солиқ ва молиявий санкциялар суммаларини, ушбу суммаларни ундириш (тўлаш) даврида амалда бўлган Марказий банкнинг қайта молиялаш ставкасидан келиб чиққан ҳолда ҳисобланган фоизларни ҳисобга олган ҳолда қайтарилади.

Айнан шу тартибда, ортиқча тўланган солиқ суммасини ўз вақтида қайтариш ва ортиқча ундирилган солиқ суммасини ҳисобга олиш (қайтариш) механизми жорий этилмоқда. Шу билан бирга, солиқ суммасини қайтаришда ҳар бир кечиктирилган кун учун солиқ органи томонидан солиқ тўловчига фоиз тўлаш назарда тутилади.

3. Солиқ органларига риск-таҳлил асосида камерал солиқ текширувлари, сайёр солиқ текширувларини ва солиқ аудитини тайинлаш ҳуқуқини берадиган солиқ назоратини амалга оширишнинг янги тартиби назарда тутилган.

Солиқ органлари томонидан солиқ текширувлари фақат Солиқ кодексида назарда тутилган ва уларни ўтказиш тартибини белгилайдиган норматив-ҳуқуқий ҳужжатлар қабул қилинганидан кейин ўтказилиши мумкин. Хусусан, Солиқ кодекси солиқ текширувларининг қуйидаги турларини назарда тутади:

а) камерал солиқ текшируви (солиқ тўловчининг ҳисоботини солиқ органида ўрганиш ва уни божхона органлари, банклар, энергетика корхоналари, кадастр ва бошқаларнинг маълумотлари билан солиштириш), унинг натижасида солиқ тўловчи солиқ ҳисоботида тузатишлар киритиши ёки асослантирилган сабабларни кўрсатиши керак.

Камерал солиқ текширувини ўтказиш учун солиқ органи раҳбарининг (раҳбар ўринбосарининг) буйруғи бўлиши шарт. Шу билан бирга, камерал солиқ текшируви доирасида солиқ органининг мансабдор шахсига солиқ тўловчидан маълум бир солиқни ҳисоблашнинг тўғрилигини тасдиқлаш учун зарур ҳужжатларни талаб қилиш ҳуқуқи берилади.

Камерал солиқ текшируви натижалари бўйича молиявий санкциялар, қўлланилмайди, лекин пеня ҳисобланиши мумкин;

б) сайёр солиқ текшируви (солиқ тўловчининг айрим кўрсаткичларини жойига чиққан ҳолда ўрганиш), унинг мақсади фактларни қайд этишдан иборат. Сайёр солиқ текшируви солиқлар ва йиғимларни ҳисоблаб чиқариш ва тўлаш ҳамда бошқа мажбуриятлар бажарилиши масалаларида маълумот тўплаш учун амалга оширилади.

Сайёр солиқ текширув натижалари бўйича солиқлар қўшимча ҳисобланмайди.

в) солиқ аудити – катта ҳажмдаги оборотларда юқори даражада рискка эга бўлган солиқ тўловчи томонидан солиқ қонунларига риоя этилишини ҳар томонлама ўрганиш. Солиқ аудити солиқларни тўлашдан бўйин товлаш хавфи омилларини таҳлил қилиш асосида танланган солиқ тўловчиларда ўтказилади.

Солиқ аудити натижаларига кўра қўшимча солиқлар ҳисобланиши ва молиявий санкциялар қўлланилиши амалга оширилиши мумкин.

Шу билан бирга, қуйидагича тартиб жорий этилади, унга мувофиқ 2022 йил 1 январгача давлат солиқ хизмати органлари солиқ аудити тайинланганлиги тўғрисида Ўзбекистон Республикаси Президенти ҳузуридаги Тадбиркорлик субъектларининг ҳуқуқлари ва қонуний манфаатларини ҳимоя қилиш бўйича вакилни хабардор қиладилар.

4. Солиқ низоларини судгача ҳал этиш тартиби аниқлаштирилган, шунингдек солиқ ҳуқуқбузарлиги туридан келиб чиқиб, жавобгарлик чоралари белгиланган.

Бунда, солиқ органининг сайёр солиқ текширувлари ва солиқ аудити натижалари бўйича қабул қилган қарорлари устидан суд тартибида шикоят қилиш фақат юқори турувчи солиқ органига шикоят қилинганидан кейингина мумкин бўлади.

5. Солиқ кодексида қуйидагилар кўзда тутилган:

солиқларни тўлашни таъминловчи янги воситалар, шунингдек коллегиял органлар (комиссиялар)нинг иштирокисиз пуллик асосда

солиқларни тўлашни кечиктириш ёки бўлиб-бўлиб тўлаш тартибини киритилиши;

солиқ солишдан бўйин товлашга қарши нормаларни, шу жумладан “битимларни қайта квалификациялаш”, “сохта битимларни” бекор қилиш, фирибгарлик битимлари бўйича чегирмаларни тақдим этмасликни белгилаш;

6. Ўзбекистон Республикаси янги таҳрирдаги Солиқ кодексида 2020 йил 1 январдан бошлаб имтиёзлар фақат Солиқ кодекси билан тақдим этилиши белгиланмоқда.

Бунда, айрим солиқлар бўйича солиқ имтиёзлари, қўшилган қиймат солиғи, акциз солиғи солинадиган маҳсулотлар ишлаб чиқарилганда ва (ёки) реализация қилинганда акциз солиғи ва ер қаъридан фойдаланганлик учун солиқдан ташқари, Ўзбекистон Республикаси Президентининг қарорлари билан фақат белгиланган солиқ ставкасини камайтириш, лекин кўпи билан 50 фоизга камайтириш тарзида ва кўпи билан уч йил муддатга берилиши мумкин.

Қўшилган қиймат солиғи бўйича имтиёзлар, шу жумладан товарлар Ўзбекистон Республикасининг ҳудудига олиб кирилишида (импортида) солиқ солишдан бўшаган маблағларни аниқ мақсадларга йўналтириш шarti билан берилиши мумкин эмас.

7. Трансферт нархларни белгилаш, назорат қилинадиган чет эл компаниялар, солиқ тўловчиларнинг қонсолидация гуруҳларининг фойдасини солиққа тортиш 2022 йилнинг 1 январидан бошлаб кучга киради ҳамда улар бўйича доимий равишда маълумотлар чоп этилиб борилади.

Ш. Солиқларни ҳисоблаб чиқиш ва тўлаш бўйича асосий ўзгаришлар

1. Қўшилган қиймат солиғи бўйича:

1.1. 2020 йил 1 январдан қўйидагилар бекор қилинади:

а) ҚҚСни ҳисоблаб чиқиш ва тўлашнинг соддалаштирилган тартиби.

Бунда, солиқ тўловчилар ҚҚСни ҳисоблаб чиқиш ва тўлашнинг соддалаштирилган тартибидан умумбелгиланган тартибга ўтганда, улар 2020 йил 1 январь ҳолатидаги товар-моддий захира қолдиқлари бўйича ҚҚС суммасини ҳисобга олиши мумкин.

Масалан, 2019 йилда соддалаштирилган тартибда ҚҚСни тўловчи корхона 2020 йилда 15 фоизлик ставкада тўловчи бўлади. 2020 йилнинг 1 январь ҳолатига корхонанинг балансида қўйидагилар мавжуд:

ҚҚС билан сотиб олинган 100 млн.сумлик товар-моддий захиралари. Шу жумладан, охириги 12 ойда сотиб олинган товар-моддий захиралари, яъни 2019 йилнинг 1 январидан 31 декабригача 80 млн.сумни ташкил этади;

ҚҚС билан сотиб олинган қолдиқ қиймати 200 млн. сўмлик асосий воситалар. Шу жумладан, 2019 йилда сотиб олинган асосий воситалар қолдиқ қиймати 50 млн. сўмни ташкил этади;

300 млн.сўмлик қурилиши тугалланмаган объект, шу жумладан 2019 йилда мазкур қийматга киритилган ҚҚС билан сотиб олинган товар ва хизматлар 150 млн.сўмни ташкил этади.

2020 йил 1 январь ҳолатига корхона қуйидагиларга тўғри келадиган ҚҚС суммасини ҳисобга олиши мумкин:

80 млн. сумлик товар-моддий захиралари қолдиқлари;

50 млн. сўмлик қолдиқ қиймат билан асосий воситалари;

150 млн.сумлик қурилиши тугалланмаган объект қийматига киритилган товар ва хизматлари.

Бунда ҚҚС суммаси товар-моддий бойликлар ва хизматлар сотиб олинганда мол етказиб беручилар томонидан кўрсатилган ставкага мувофиқ улар қийматини камайтиради.

б) айланмадан солиқ тўловчиларнинг ҚҚСни ихтиёрий равишда тўлаш имконияти.

1.2. Қўйидагилар товарлар (хизматлар) реализациясидан даромад миқдори кўрсаткичидан қатъи назар ҚҚС тўлайдилар:

Ўзбекистон Республикасининг божхона чегараси орқали товарларни олиб ўтувчи юридик шахслар ва яқка тартибдаги тадбиркорлар;

акциз ости товарлар (хизматлар) ишлаб чиқарувчи ва (ёки) фойдали қазилмаларни қазиб олувчи юридик шахслар;

қишлоқ хўжалиги маҳсулотларни ишлаб чиқарувчи юридик шахслар – уларда 50 гектар ва ундан кўп бўлган суғориладиган қишлоқ хўжалиги ерлари мавжуд бўлганда;

бензин, дизель ёқилғиси ва газни реализация қилувчи юридик шахслар;

лотереяни ташкил этиш фаолиятини амалга оширувчи юридик шахслар;

оддий ширкат шартномаси доирасида амалга ошириладиган фаолият бўйича – оддий ширкатнинг ишларини юритиш вазифаси зиммасига юклатилган ишончли шахс – оддий ширкатнинг иштирокчиси;

ваколатли органнинг ҳулосаси чиқарилган тугалланмаган ишлаб чиқариш объектлари ва фойдаланилмаётган ишлаб чиқариш майдонларининг мулкдорлари бўлган юридик шахслар;

марказлаштирилган манбалар ҳисобидан молиялаштириладиган объектларни қурилишини (жорий ва мукамал таъмирлашдан ташқари) бажарувчи юридик шахслар.

1.3. 2020 йил 1 январдан қуйидагилар ҚҚС тўловчилари ҳисобланади:

чет эл юридик шахсларнинг доимий муассасалари (товарлар (хизматлар) реализациясидан даромад миқдоридан қатъий назар). Доимий муассасалар ҳам 2020 йил 1 январь ҳолатига товар-моддий бойликлар қолдиғи бўйича ҚҚС суммасини ҳисобга олиши мумкин;

Ўзбекистон ҳудудида товарларни (хизматларни) реализация қилувчи чет эллик юридик шахслар, агар бу товарларни (хизматларни) сотиш жойи Ўзбекистон ҳисобланса.

ҚҚС тўловчиси сифатида рўйхатдан ўтиш кодини олиш учун, 2020 йил 1 январдан ҚҚСга ўтиш бўйича мажбурияти вужудга келган солиқ тўловчиларга 2020 йилнинг 10 январига қадар ҚҚСга ўтиш бўйича тегишли аризани бериш тавсия этилади.

1.4. Солиқ агентлари томонидан ҚҚС тўлаш тартиби киритилмоқда.

Бу ҳоллатда ҚҚС тўлаш солиқ агенти ва товарларни (хизматларни) реализация қилувчи шахсларнинг товарлар (хизматлар) реализациясидан олинган даромади миқдоридан қатъий назар амалга оширилади.

ҚҚС тўлаш мақсадида солиқ агенти деб қуйидагилар тан олинади:

а) давлат мулкани ижарага бериш бўйича ваколатли орган – Ўзбекистон Республикаси ҳудудида давлат ҳокимияти ва бошқаруви органлари томонидан давлат мулкани ижарага берганда.

Солиқ агенти шартномада белгиланган ижара тўлови суммасидан ҚҚСни ушлаб қолиш ва бюджетга ўтказиб беришга мажбур. Бинобарин, давлат мулкани ижарага бериш бўйича ваколатли орган шартномада ҚҚС суммасини кўзда тутиши лозим. ҚҚС тўловчилари бу шарномалар бўйича солиқ суммасини Солиқ кодексида белгиланган тартибда ҳисобга оладилар;

б) юридик шахслар ёки яққа тартибдаги тадбиркорлар – ҚҚС тўловчиси сифатида Ўзбекистон Республикаси солиқ органларида ҳисобга турмаган чет эллик шахслардан товарлар (хизматларни) сотиб олганда.

Топшириқ, воситачилик шартномалари ёки бошқа воситачилик шартномалари асосида чет эллик шахслар томонидан товарлар (хизматлар) реализацияси амалга оширилганда, солиқ агенти деб воситачи ёки ишончли вакил тан олинади.

1.5. Хизматларни реализация қилиш жойини аниқлаш ва уларга ҚҚС солиш тартиби қайта кўриб чиқилган. Жумладан, реализация жойи Ўзбекистон Республикаси деб тан олинмаган хизматларни кўрсатиш эндиликда солиққа тортилмайдиган оборот сифатида қаралмайди.

Реализация жойи Ўзбекистон Республикаси деб тан олинмаган хизматларни кўрсатувчи хужалик субъектлари ҳақиқатда кўрсатилган хизматлар бўйича тўланган (тўланиши лозим бўлган) ҚҚСни ҳисобга олиш ҳуқуқига эга.

Янги тартибга мувофиқ солиққа тортилмайдиган оборотлар деб факат солиққа тортишдан озод этилган оборотлар тан олинади.

Хизматларни реализация қилиш жойини аниқлашда хизматни олувчи шахсинг ўз фаолиятини амалга ошириш жойи устувор принцип ҳисобланади.

Агар, хизматни олувчи шахс Ўзбекистон Республикаси фаолиятини амалга оширса, мазкур хизматларни реализация жойи Ўзбекистон Республикаси ҳисобланади.

Солиқ кодексининг 239-моддаси учинчи қисми 1-10-бандларида кўзда тутилган хизматларни реализация қилиш жойи уларнинг олувчилари Ўзбекистон Республикасида фаолиятини амалга оширса, агар мазкур хизматлар Ўзбекистон Республикасининг ташқарисида кўрсатилса, Ўзбекистон Республикаси ҳисобланмайди.

Шунга мувофиқ, мазкур тартиб доирасида хизматлар экспортини амалга оширишда (Солиқ кодексининг 239-моддаси учинчи қисми 1-10-бандларида кўзда тутилган хизматлар бундан мустасно) реализация жойи Ўзбекистон Республикаси ҳисобланмайди ва Ўзбекистон Республикасида ҚҚСга тортилмайди.

Шу билан бирга, мазкур хизматлар реализацияси бўйича оборот солиққа тортиладиган оборот деб тан олинади ва солиқ тўловчилар сотиб олинган товарлар (хизматлар) бўйича ҚҚС суммасини ҳисобга олиш ҳуқуқига эга.

1.6. Товарлар (хизматлар) реализацияси бўйича оборотлар рўйхати оптималлаштирилмоқда. Жумладан, иқтисодий жиҳатдан ўзини оқлайдиган товарларни (хизматларни) бепул бериш товарлар (хизматлар) реализацияси бўйича оборот деб ҳисобланмайди ва ҚҚСга тортилмайди.

Шу билан бирга, оддий ширкат шартномаси бўйича улуш сифатида товарларни (хизматларни) бериш, шунингдек уларни таъсисчилар ёки оддий ширкат шартномаси бўйича иштирокчилар таркибидан чиққанда бериш, бирламчи улуш миқдоридан қатъи назар, ҚҚСга тортилади.

1.7. Улар бўйича оборот ҚҚСдан озод этиладиган операцияларнинг рўйхати қисқартирилган.

Жумладан, 2020 йил 1 апрелдан кўйидаги товарларга (хизматларга) имтиёзлар бекор қилинади:

а) босма маҳсулотлари, грант ҳисобидан сотиб олинмайдиган товарлар, давлат захирасининг товар-моддий захиралари уларни янгиланишида, инвестор ва давлат мулкларни бошқариш бўйича ваколатли давлат органи ўртасида тўзилган шартномага мувофиқ инвестицион мажбурият сифатида мулклар ўтказилганда, Ўзбекистон Республикаси Вазирлар Маҳкамасининг қарори бўйича тижорат банкларининг ўз ҳисобидан қўрилган кўчмас мулк объектлари;

б) ҳаво кемаларига хизмат кўрсатиш, шу жумладан аэронавигация хизмати, туристик хизматлар, грант ҳисобидан олинган хизматлар, давлат тилини ва давлат тилида иш юритишни ўргатиш хизматлари, давлат мулкани ижара беришдан хизматлар, оммавий ахборот воситалари ва китоб маҳсулотларини етказиш бўйича хизматлар, қатъий миқдорда белгиланган тариф бўйича молиявий хизматлар.

Ҳаво кемаларига хизмат кўрсатиш юзасидан бевосита Ўзбекистон Республикаси аэропортларида ва Ўзбекистон Республикасининг ҳаво бўшлиғида амалга ошириладиган хизматлар, шу жумладан аэронавигация хизмати 2020 йил 1 январдан ноль ставкасида ҚҚСга тортилади.

Халқаро ва чет эл ҳукумат молия ташкилотлари томонидан берилган қарзлар (кредитлар) юридик шахслар оладиган, шунингдек грантлар ҳисобига олинган товарлар (ишлар, хизматлар) бўйича имтиёз қарз битимида кўзда тутилган бўлса, қўлланилади.

Шу билан бирга, Ўзбекистон Республикасининг халқаро шартномалари бўйича халқаро ва чет эл ҳукумат молия ташкилотлари томонидан берилган қарзлар (кредитлар) ҳисобига юридик шахслар оладиган, шунингдек грантлар ҳисобига олинган товарлар (ишлар, хизматлар) халқаро ва чет эл ҳукумат молия ташкилотлари томонидан маъқулланган лойиҳалар доирасида 2020 йил 1 июлгача ҚҚС ва акциз солиғига тортилмайди.

Бунда 2020 йил 1 январдан бошлаб қўйидаги янги имтиёзлар киритилмоқда:

а) ишловчилари умумий сонининг камида 50 фоизи ногиронлиги бўлган шахслардан иборат бўлган ҳамда ногиронлиги бўлган шахслар меҳнатига ҳақ тўлаш фонди умумий меҳнатга ҳақ тўлаш фондининг камида 50 фоизини ташкил этадиган, ягона иштирокчиси ногиронлиги бўлган шахсларнинг жамоат бирлашмалари ҳисобланган юридик шахслар томонидан реализация қилинадиган товарлар ва хизматлар

б) товарларни (хизматларни), агар товарларни бериш (хизматлар кўрсатиш) Ўзбекистон Республикаси Президентининг ёки Ўзбекистон Республикаси Вазирлар Маҳкамасининг қарори асосида бепул амалга оширилса;

в) қимматбаҳо металллардан ишланган банк ва ўлчовли қуймаларини, қимматбаҳо металллардан ишланган қуйма (инвестиция) тангаларни (нумизматика мақсадлари учун фойдаланиладиган тангалардан, шунингдек қимматбаҳо металллардан ишланган чет эл тангаларидан ташқари), заргарлик буюмлар;

г) бюджет маблағлари ҳисобидан ҳар йиллик минерал хом ашё базасини ривожлантириш ва қайта тиклаш давлат дастурлари доирасида кўрсатиладиган геология хизматлари.

1.8. Реализация қилинадиган товарлар (хизматлар) шу жумладан уларни текин беришда таннархга боғланган ҚҚС бўйича солиқ солинадиган базани аниқлашнинг эскирган усуллари бекор қилинмоқда. Бунинг ўрнига, уларнинг бозор қиймати бўйича солиқ солиш назарда тутилмоқда.

Бунда, товарлар (хизматлар) текинга бериш, агар бундай ўтказиб бериш иқтисодий жиҳатдан асослантирилган бўлса, товарларни текин бериш (хизматлар кўрсатиш) солиққа тортиладиган айланма сифатида қаралмайди.

Лизинг операциялари учун солиқ солинадиган базани аниқлаш тартиби сақланиб қолинмоқда, унга мувофиқ Солиқ кодексининг 246-моддасига биноан солиқ солишдан озод қилинган технологик ускуналар (ускуналар) молиявий ижарага (лизингга) берилганда, солиқ солинадиган база ушбу ускуна сотиб олиш нархи ва сотиш баҳоси ўртасидаги ижобий фарқдан келиб чиққан ҳолда аниқланиши тартиби сақланиб қолинмоқда.

1.9. Солиқ кодексида ҚҚСнинг ноль ставкасини қўллаш бўйича халқаро ҳуқуқни имплементация қилиш назарда тутилмоқда. Масалан, дипломатик корпус ва унинг ходимлари расмий фойдаланиш учун товарлар (хизматлар) сотиб олишда тўланган ҚҚСни қайтариб олиш имкониятига эга.

1.10. Узоқ муддатли активлар бўйича бир марталик ҳисобга олиш, яъни хўжалик юритувчи субъектлар узоқ муддатли активлар бўйича уларни сотиб олишда ҚҚСни айланма маблағлардан фойдаланишни чекловчи 12 ва 36 ойлик даврларга ажратмасдан, тўлиқ ҳисобга олиши мумкин.

Бунда, сотиб олинган узоқ муддатли активлар бўйича ҳисобга олинмаган ва 2020 йил 1 январдан 4410 “Солиқлар ва бошқа мажбурий тўловлар бўйича аванс тўловлари (турлари бўйича)” дебети бўйича ҚҚС суммаси 6410 “Бюджетга тўловлар бўйича қарзлар (турлар бўйича)” дебетига тўлиқ ҳисобга олинади. Ушбу қоида фақат 2019 йилда сотиб олинган узоқ муддатли активларга нисбатан қўлланилади (ҚҚС бўйича ҳисобга олиш ҳуқуқи 2019 йил 1 январдан кейин берилган).

1.11. ҚҚС тўловчилари тоифасига ўтганда, шунингдек солиқ имтиёзлари бекор қилинган тақдирда, солиқ тўловчи ҚҚС миқдорини фақат сўнгги 12 ой ичида сотиб олинган ТМЗ қолдиқларига ҳисобга олиш ҳуқуқига эга бўлади. Узоқ муддатли активлар бўйича ҚҚС, солиқ қийматини ўз ичига олган қайта баҳоланиш ҳисобга олмаганда, уларнинг баланс (қолдиқ) қийматига қараб белгиланади.

Масалан, 2019 йилда товарларни (хизматларни) реализация қилишдан тушган даромаднинг чекланган миқдорини оширган солиқ тўловчи 2020 йил 1 январдан бошлаб ҚҚС тўлашга ўтади.

2020 йил 1 январ ҳолатига кўра ушбу солиқ тўловчининг омборида 1,4 миллиард сўмлик товарлар захиралари мавжуд, улардан 233,3 миллион сўм ҚҚС қийматига тўғри келади.

Ушбу қолдиқларнинг 600 миллион сўмлик қисми (шу жумладан, 100 миллион сўмлик ҚҚС) 2017 йилда сотиб олинган, қолган 800 миллион сўм (ҚҚС билан 133,3 миллион сўм) 2019 йил март ойида сотиб олинган.

Янги қоидаларга кўра, ушбу солиқ тўловчи 2020 йил 1 январдан бошлаб ҚҚС тўлашга ўтишда, 2019 йилда сотиб олинган қолдиқларга тўғри келадиган 133,3 миллион сўм солиқни ҳисобга олиши мумкин (яъни охириги 12 ой ичида).

1.12. ҚҚС ҳисобга олишни қўллаш шarti - ҚҚС тўловчиси сифатида тегишли рўйхатдан ўтказиш махсус ҳисобга олиш рақамини олиш сақланиб қолинади.

Бунда, солиқ тўловчилар тадбиркорлик фаолиятида фойдаланиш учун сотиб олинмаган товарлар бўйича ҳисобга олишлари мумкин эмас, хусусан:

енгил автомобиллар, мотоцикллар, вертолётлар, моторли кемалар, самолётлар, шунингдек бошқа турдаги автотранспорт воситалари ва улар учун ёқилғи;

алкогол ва тамаки маҳсулотлари.

Ҳисобга олишга шунингдек, вакиллик харажатларига тўғри келадиган ҚҚС суммалари киритилмайди.

1.13. ҚҚС ставкалари 15 фоиз ва ноль ставкада сақланиб қолинади.

1.14. Солиқ даври бир ой. 2020 йилдан бошлаб ҚҚС бўйича солиқ ҳисоботлари солиқ органларига ортиб бормайдиган яқун билан тақдим этилади.

Солиқ ҳисоботини тақдим этиш ва ҚҚС тўлаш ҳар ойда - ўтган солиқ давридан кейинги ойнинг 20-кунидан кечиктирмай амалга оширилади.

Солиқ агентлари ҳам шу муддатлардасолиқ ҳисоботларини тақдим этадилар ва солиқни тўлайдилар.

1.15. Ортиқча ҚҚСни қайтариш нафақат ноль ставка бўйича солиқ солинадиган оборотлар учун, балки ҚҚСнинг умумий қоидаларини қўллаш натижасида юзага келган операциялар учун ҳам жорий этилади. Бунда, умумбелгиланган тартибда қайтариш муддати 60 кунни ташкил қилади.

Ҳисобга олинган ҚҚС суммасининг ҳисобланган солиқ суммасидан ошиб кетиши натижасида келиб чиққан ҚҚС миқдорини қайтариш 2020 йил 1 июлдан бошлаб амалга оширилади (ушбу қоида ҚҚС бўйича ноль ставкани қўллаган солиқ тўловчиларга нисбатан қўлланилмайди).

Солиқ тўловчиларнинг алоҳида тоифаси учун ҚҚСни қайтаришнинг 7 кун ичида тезлаштирилган тартиби тақдим этилади (йирик солиқ тўловчилар, экспорт қилувчилар, банк кафолатини тақдим этган солиқ тўловчилар, хорижий дипломатик ваколатхоналар, маҳсулот тақсимоти тўғрисидаги битим қатнашчилари, солиқ мониторинги иштирокчилари).

Шу билан бирга, хорижий дипломатик ваколатхоналар ва маҳсулот тақсимотига оид битим тарафлари (шартномада шундай шартларни ҳисобга

олган ҳолда) томонидан сотиб олинган товарлар (хизматлар) ҚҚС билан реализация қилинади, кейинчалик улар харидор томонидан қайтарилади.

Бунда, ҚҚС ни қайтариш хорижий дипломатик ваколатхоналарга ва маҳсулот тақсимоти тўғрисидаги битимнинг томонларига (шартномада шундай шартларни ҳисобга олган ҳолда) 2020 йилда сотиб олинган товарлар (хизматлар) учун 2020 йил 1 январдан амалга оширилади.

1.16. Ўзбекистон Республикасида жисмоний шахсларга чет эл компаниялар томонидан тақдим этиладиган электрон хизматларга солиқ солиш тартиби жорий этилмоқда.

Агар электрон хизматлар воситачиларни жалб қилган ҳолда чет эл компаниялар томонидан амалга оширилса, жисмоний шахслар билан ҳисоб-китобларни амалга оширадиган чет эл компанияларининг воситачиларига ҚҚС бўйича солиқ мажбурияти юклатилади.

Ўзбекистон Республикасининг резиденти бўлган юридик шахсларига ва Ўзбекистон Республикасида доимий муассасалар орқали фаолият кўрсатувчи юридик шахслари бўлган Ўзбекистон Республикасининг норезидентларига электрон хизматларни тақдим этишда ҚҚС бўйича мажбуриятларнинг бажарилиши шундай хизматларни сотиб олувчиларга юклатилади.

2. Фойда солиғи бўйича:

2.1. Қуйидагилар фойда солиғи тўловчилари ҳисобланади:

Ўзбекистон Республикасининг солиқ резидентлари бўлган юридик шахслар;

Ўзбекистон Республикасида фаолиятни доимий муассасалар орқали амалга оширадиган ҳамда манбалардан даромадлар олувчи Ўзбекистон Республикаси норезидентлари бўлган юридик шахслар;

солиқ тўловчилар консолидациялашган гуруҳининг масъул иштирокчилари бўлган юридик шахслар;

солиқ даврида товарларни (хизматларни) реализация қилишдан олган даромадлари 1 миллиард сўмдан ортиқ бўлган ёки ўз ихтиёри билан фойда солиғини тўлашга ўтган яқка тартибдаги тадбиркорлар;

оддий ширкат шартномаси доирасида амалга ошириладиган фаолият бўйича оддий ширкатнинг ишончли шахслари.

2.2. Айланмадан солиқ тўловчи шахслар фойда солиғи тўловчилари ҳисобланмайди.

2.3. Қуйидаги имтиёзлар 2020 йил 1 апрелдан бекор қилинади:

а) Ўзбекистон Республикаси Миллий гвардиясининг қўриқлаш бўлинмалари учун;

б) қуйидаги фаолият турлари амалга оширилганда олинган фойда қисми бўйича:

протез-ортопедия буюмлари, ногиронлар учун инвентарлар ишлаб чиқаришдан, шунингдек ногиронларга ортопедик протезлаш хизмати кўрсатишдан, ногиронлар учун мўлжалланган протез-ортопедия буюмлари ва инвентарларни таъмирлаш ҳамда уларга хизмат кўрсатишдан;

шаҳар йўловчилар транспортида (таксидан, шу жумладан йўналишли таксидан ташқари) йўловчиларни ташиш бўйича хизматлар кўрсатишдан;

моддий маданий мерос объектларини таъмирлаш ҳамда қайта тиклаш ишларини амалга оширишдан.

2.4. Қуйидаги даромадларга солиқ имтиёзлари сақланиб қолинмоқда:

давлат облигациялари ва давлатнинг бошқа қимматли қоғозлари бўйича даромадлар, шунингдек Ўзбекистон Республикаси резидентлари бўлган юридик шахсларнинг халқаро облигациялари бўйича даромадлар;

Халқ банки томонидан фуқароларнинг шахсий жамғариб бориладиган пенсия ҳисобварақларидаги маблағлардан фойдаланишдан олинган фойдаси.

2.5. Зарарларни тақсимлаб кўчириш муддати 5 йилдан 10 йилга, зарарларни тақсимлаб кўчириш чегаравий миқдори солиқ солинадиган базанинг 50 фоиздан 60 фоизгача ўсган.

Шу билан бирга, 2020 йил 1 январга қадар солиқ тўловчи кўрилган зарарларни ушбу зарар кўрилган солиқ давридан кейинги беш йил ичида келгусига тақсимлаб ўтказишни амалга оширишга ҳақлидир. Тақсимлаб ўтказилаётган зарарнинг ҳар бир навбатдаги солиқ даврида ҳисобга олиннадиган жами суммаси жорий солиқ даврининг ҳисоблаб чиқарилган солиқ солинадиган фойданинг 50 фоизидан ошмаслиги керак.

2.6. Банклар, цемент ва полиэтилен гранулаларни ишлаб чиқарувчир ҳамда уяли алоқа операторлари учун солиқ ставкаси 20 фоиз миқдорида сақланган. Бозор ва савдо комплексларида 20 фоиз миқдорида солиқ ставкаси қўлланилади.

2.7. Фойда солиғи бўйича қуйидагиларга 0 фоиз миқдорида ставка ўрнатилган:

ўзи ишлаб чиқарган ўз қишлоқ хўжалиги маҳсулотини реализация қилишдан олинган фойдаси бўйича қишлоқ хўжалиги товар ишлаб чиқарувчи корхоналари учун. Бунда, реализация қилинган қишлоқ хўжалиги маҳсулотлари ҳажми 90 фоиздан ортиқ ташкил этилиши лозим;

ижтимоий соҳалар учун;

Бюджет ташкилотлари учун. 2023 йил 1 январгача ходимларни моддий рағбатлантиришга ҳамда моддий-техник ва ижтимоий базасини мустаҳкамлашга мақсадли ишлатиш шарти билан қўшимча манбалардан олинган даромадларга ноль ставка миқдорида қўлланилиши кўзда тутилган.

Товарларни (ишларни) экспортга реализация қилишдан олинган фойдаси учун. Экспортдан олинган даромад 15 фоиздан кам бўласлиги лозим.

Бунинг учун экспорт кунидан 180 кунгача кечиктирмай экспорт ва даромадлар тушишини ҳужжатли тасдиқланиши талаб қилинади. Ўзбекистон Республикаси Президентининг 2018 йил 29 ноябрда ПФ-5587-сон фармони билан тасдиқланган рўйхатдаги хом-ашё товарлар ҳамда халқаро йўналишда ташиш (автотранспортдан ташқари), қувур ва газ қувури бўйича ташиш учун ноль миқдорда ставка қўлланилмайди.

2.8. Электрон савдо фаолиятини амалга оширувчи корхоналар учун 7,5 фоиз миқдорида камайтирувчи ставкалар ўрнатилаяпти. Бунда, электрон савдо ҳажми 90 фоиздан кам бўлмаслиги керак.

2.9. Бошқа солиқ тўловчилар учун 15 фоиз миқдорида ставка ўрнатилган.

2.10. Олдин солиққа тортилган даромадларни ҳисобга олиш механизмини жорий этган ҳолда дивидендларни каскадли солиққа тортилиши бекор қилинмоқда.

2.11. Харид қилиш учун йўналтирилган маблағларни солиқ солинадиган базадан камайтириш имтиёзини бекор қилган ҳолда технологик ускуналар ва кўчмас мулк объектларни харид қилиш даврида амортизация ажратмаларни бир йўла ҳисобга олиш тартиби жорий қилинмоқда.

2.12. Чораклик солиқ ҳисоботларини – ҳисобот давридан кейинги ойнинг 20 кунидан кечиктирмай ҳамда йиллик солиқ ҳисобларини – солиқ даври ўтгандан кейинги йилнинг 1 мартдан кечиктирмай тақдим этилади.

Жами даромади жорий солиқ давридан олдинги солиқ даври учун 5 миллиард сўмгача бўлган солиқ тўловчилар томонидан солиқни тўлаш солиқ ҳисоботини тақдим этиш муддатларидан кечиктирмай амалга оширилади, 5 миллиард сўмдан ошадиган солиқ тўловчилар ҳар ойлик бўнак тўловларини ҳисобот даври ҳар бир ойнинг 23 кунидан кечиктирмай тўлайди.

Солиқ органи томонидан бўнак тўлови суммасини олдинги солиқ даври учун ҳисобланган жами даромаддан келиб чиққан ҳолда ҳисобланади, биринчи чорагида тўланиши лозим бўлган ҳар ойлик бўнак тўловининг суммаси ўтган солиқ даврининг охириги чорагида тўланиши лозим бўлган ҳар ойлик бўнак тўлови суммасига тенг этиб қабул қилинади. Жорий тўловлар учун маълумотнома тақдим этилмайди.

2020 йил 1 чорак учун фойда солиғи бўйича бўнак тўловлар қуйидаги тартибда аниқланади ва тўланади.

2019 йил 9 ойлик жами даромад суммаси 9 га бўлиниб ва 12 га кўпайтирилганда 5 миллиарддан ошган солиқ тўловчилар 2020 йил 23 январь, 2020 йил 23 февраль ва 2020 йил 23 мартдан кечиктирмай тўланиши лозим бўлган бўнак тўлов суммасини мос равишда 2019 йил 10 октябрь, 2019 йил 10 ноябрь ва 2019 йил 10 декабрда ҳисобланган бўнак тўлови миқдорида ҳисоблайдилар. Бунда жами даромад молиявий натижалар тўғрисидаги ҳисобот сатрлари йиғиндисидан аниқланади:

- маҳсулот реализациясидан соф тушум (товар, хизмат ва ишлар) (010-сатр);
- асосий фаолиятдан бошқа даромадлар (090-сатр);
- молиявий фаолиятдан даромадлар (110-сатр).

2.13. Солиқ агентлари томонидан тўланган фоизлар 2020 йил 1 январдан бошлаб даромад олувчиларнинг жами даромади таркибига киради ва Солиқ кодексда белгиланган тартибда солиққа тортилади, бундан нотижорат ва бюджет ташкилотлари, Ўзбекистон Республикаси норезидентлари - жисмоний ва юридик шахслар мустасно.

2.14. Солиқ кодексга мувофиқ якка тартибдаги тадбиркор солиқ базасини ҳисоблаб чиқаришнинг соддалаштирилган тартибини танлашга ҳақли.

Якка тартибдаги тадбиркорлар солиқ базасини ҳисоблаб чиқаришнинг соддалаштирилган тартибини қўллаш учун солиқ ҳисобида турган жойдаги солиқ органига Ўзбекистон Республикаси Давлат солиқ қўмитаси томонидан белгиланган шаклдаги билдиришномани қуйидаги муддатларда тақдим этади:

- 1) янгидан рўйхатдан ўтказилганлар – тадбиркорлик фаолиятини амалга ошириш бошлангунига қадар;
- 2) фойда солиғини тўлашга ўтганлар, шу жумладан ихтиёрий равишда ўтганлар – бир вақтнинг ўзида фойда солиғини тўлашга ўтиш тўғрисидаги билдиришномани солиқ ҳисобида турган жойдаги солиқ органига юборганда;
- 3) қолганлари – жорий йилнинг 25 январидан кечиктирмай.

Якка тартибдаги тадбиркорлар томонидан 2020 йил 1 январдан бошлаб солиқ базасини ҳисоблаб чиқаришнинг соддалаштирилган тартибини қўллаш учун 2020 йил 1 февралдан кечиктирмай солиқ ҳисобида турган жойдаги солиқ органига билдиришнома тақдим этилиши лозим.

3. Жисмоний шахслардан олинадиган даромад солиғи бўйича:

3.1. Жисмоний шахсларнинг алоҳида тоифаларининг (якка тартибдаги тадбиркорлар, ҳунармандлар, оилавий тадбиркорлик субъектлари аъзолари) қатъий белгиланган солиқни тўлаш ўрнига жисмоний шахслардан олинадиган даромад солиғини тўлаши кўзда тутилган. Шу билан бирга, уларга йиллик даромад декларацияси асосида солиқ тўлашни танлаш ҳуқуқини бериш режалаштирилган. Бунда “Ҳунарманд” уюшмаси аъзоси бўлган ва ҳозирда қатъий белгиланган солиқни тўлашда имтиёзларга эга бўлган ҳунармандлар учун, ҳунармандчилик маҳсулотларини (товарлар, хизматлар) ишлаб чиқариш ва сотиш бўйича даромад солиғини тўлашдан озод қилишни назарда тутадиган имтиёзли солиқ тартиби амал қилади.

3.2. Жисмоний шахсларнинг жами даромадларини аниқлаш тартиби қайта кўриб чиқилмоқда. Жумладан, ҳозирги вақтда жисмоний шахснинг жами даромадига киритилган ва кейинчалик солиқ солинадиган базани

аниқлашда чегирилган (пенсия, стипендия, ижтимоий нафақа, алимент ва бошқалар) даромадларнинг айрим турлари, 2020 йил 1 январдан бошлаб солиқ тўловчининг жами даромадларига киритилмайди.

Бундан ташқари, жисмоний шахснинг банк ҳисобварағига ўтказилган пул маблағлари ва нақд пул кўринишидаги даромадлар ва (ёки) ташкилотнинг содиқлик дастурида жисмоний шахснинг иштирок этиши натижасида олинган ташкилот томонидан товарлар ва (ёки) хизматларнинг тўлиқ ёки қисман тўланадиган даромадлар солиқ тўловчининг даромади ҳисобланмайди.

3.3. 2019 йилда амал қилган жисмоний шахслардан олинадиган даромад солиғи ставкалари сақланиб қолинади:

а) Ўзбекистон Республикасининг резидентлари бўлган жисмоний шахслар:

жисмоний шахслардан олинадиган даромад солиғининг асосий ставкаси – 12 фоиз. Дивидендлар ва фоизлар кўринишидаги даромадларга 5 фоиз миқдорида солиқ солинади;

б) Ўзбекистон Республикаси норезидентлари бўлган жисмоний шахслар учун:

дивиденд ва фоизлар – 10%;

халқаро юк ташишдаги транспорт хизматларини кўрсатишдан олинган даромадлар (юк ташишдан олинадиган даромадлар) - 6%;

меҳнат шартномалари ва фуқаролик-ҳуқуқий шартномалар бўйича олинган даромадлар, бошқа даромадлар - 20%.

3.4. Жисмоний шахслардан олинадиган даромад солиғи бўйича имтиёزلарни қуйидаги йўллар билан оптималлаштириш режалаштирилган:

а) Ўзбекистон Республикасида ҳаётни узоқ муддатли суғурта қилиш, шунингдек ипотека кредитлари ва улар бўйича ҳисобланган фоизларни тўлаш учун лицензияга эга бўлган юридик шахсларга суғурта мукофотларини тўлаш учун ажратилган маблағлар бўйича имтиёзлар бериш тартибини қайта кўриб чиқиш (солиқ даври давомида солиқ чегирмаларининг максимал миқдори белгиланади);

б) таълим тўловлари учун ажратилган маблағ (ўзи ёки унинг йигирма олти ёшгача бўлган болалари учун), шунингдек, йигирма олти ёшга тўлмаган турмуш ўртоғи учун тўловлар бўйича тақсимланиши;

в) солиқ тўлашдан озод қилиш тарзидаги айрим имтиёзларнинг бекор қилиниши:

хусусий корхона эгаси, оилавий корхона аъзоси ва фермер хўжалиги раҳбари ихтиёрида қолган солиқлар ва бошқа мажбурий тўловлардан кейинги фойда миқдори;

меҳнат шартномаси бекор қилинганда энг кам иш ҳақининг ўн икки баравари миқдорида тўланадиган таътил нафақаси;

ихтиёрий равишда тугатилган хўжалик юритувчи субъект - юридик шахсга ўз мажбуриятларини бажариш учун йўналтирилган юридик шахс таъсисчилари (қатнашчилари) даромадларининг миқдори;

акциядорлик жамиятларининг чет эллик ишчиларининг бошқарув кадрлари сифатидаги фаолиятдан олган даромадлари;

г) концерт ва кўнгилочар фаолият билан шуғулланиш ҳуқуқига эга бўлган жисмоний шахслар учун - ушбу фаолиятдан олинган даромадлар бўйича солиқ имтиёзлари бекор қилиниши; шунингдек, якка тартибдаги тадбиркор билан меҳнат муносабатларида бўлганлар - якка тартибдаги тадбиркор билан тузилган меҳнат шартномаси бўйича ишларни бажаришдан олган даромадлари бўйича;

3.5. Солиқлар суммаси ва меҳнат ҳақининг энг кам миқдорини аниқлашда ишлатиладиган базавий ҳисоблаш миқдори кўрсаткичининг жорий этилиши муносабати билан энг кам иш ҳақининг бир қаррали миқдорларида белгиланган имтиёзлар мос равишда базавий ҳисоблаш миқдори ва меҳнатга ҳақ тўлашнинг энг кам миқдорига қайта кўриб чиқилади.

3.6. Жисмоний шахсларнинг алоҳида тоифасини қатъий белгиланган солиқ ўрнигага жисмоний шахслардан олинадиган даромад солиғини тўлаш ва уларга йиллик умумий даромадлар тўғрисидаги ҳисобот асосида солиқ тўлашни танлаш ҳуқуқини бериш муносабати билан:

қатъий белгиланган солиқ тўлови хусусиятлари назарда тутилган (якка тартибдаги тадбиркорлар учун белгиланган солиқ суммалари Ўзбекистон Республикасининг 2019 йил 9 декабрдаги ЎРҚ-589-сонли “Ўзбекистон Республикасининг 2020 йилги Давлат бюджети тўғрисида” ги Қонуни билан тасдиқланган);

улар томонидан йиллик жами даромадлар тўғрисидаги декларация асосида солиқ тўлаш тартиби батафсил баён қилинмоқда (мулкни ижарага беришдан даромад оладиган жисмоний шахслар сингари дастлабки декларацияни топшириш тартиби).

3.7. Жисмоний шахслардан олинадиган даромад солиғи ва ижтимоий солиқ бўйича солиқ ҳисоботини ҳар ойнинг 15-кундан кечиктирмасдан топшириш муддатларини бирлаштиришни назарда тутди. Бу ҳолда, солиқ агенти томонидан ҳисобланган солиқ суммасини тўлаш жисмоний шахсга даромадни тўлаш билан бир вақтда, **солиқ ҳисоботини топшириш муддатларидан кечиктирмай амалга ошириладиган тартиб** белгиланади.

3.8. Ходимлари сони 25 нафардан ортиқ бўлган филиаллар ва алоҳида бўлинмаларнинг ушбу бўлинмалар ва филиаллар ходимлари юзасидан солиқ ҳисоботларини **мустақил равишда** бундай филиаллар ва алоҳида бўлинмалар рўйхатга олинган жойдаги солиқ органига тақдим этиш ва тегишинча ҳисобланган солиқ суммаларини тўлаш назарда тутилмоқда. ..

3.9. Якка тартибдаги тадбиркорлар учун декларация асосида ёки белгиланган миқдорда солиқни танлаш ва тўлаш учун қуйидаги тартиб ўрнатилди.

1) Умумий қоидалар.

Ўзбекистон Республикаси Солиқ кодексининг янги таҳририга биноан якка тартибдаги тадбиркорлар – календар йилида товарларни (хизматларни) сотишдан олинган даромади 100 миллион сўмдан ошмайдиган жисмоний шахслар даромад солиғини тўлаш тартибини танлаш ҳуқуқига эга:

тегишли фаолият тури учун белгиланган миқдорда;

умумий белгиланган 12 фоиз ставкаси бўйича олинган ҳақиқий даромад асосида йиллик умумий даромад декларацияси асосида.

Танлаш қуйидаги йўллар билан амалга оширилади:

тадбиркорлик субъектини давлат рўйхатидан ўтказишда танланган солиқ тўлаш тартибини кўрсатган ҳолда;

танланган солиқ тўлаш тартиби тўғрисида хабарни доимий яшаш жойидаги солиқ органларига жорий йилнинг 25 январидан кечиктирмасдан тақдим этиш орқали.

Жисмоний шахс томонидан белгиланган муддатда хабарнома тақдим этилмаганлиги унинг солиқни қатъий белгиланган миқдорда тўлашга розилигини билдиради.

Агар якка тартибдаги тадбиркорнинг солиқ давридаги товарларни (хизматларни) сотишдан олган даромади 100 миллион сўмдан ошса, лекин бир миллиард сўмдан ошмаса, у айланмадан солиқ тўловчиси деб эътироф этилади. Бунда товарларни импорт қилувчи якка тартибдаги тадбиркорларга айланмадан солиқ қўлланилмайди.

Солиқ даврида товарлар (хизматлар) сотишдан олинган даромадлари бир миллиард сўмдан ошган якка тартибдаги тадбиркорлар қўшилган қиймат солиғи ва даромад солиғини тўлашга ўтмоқдалар.

Якка тартибдаги тадбиркор ихтиёрий равишда даромад солиғи ва ҚҚС тўлашга ўтишга ҳақли.

2) Йиллик умумий даромад декларацияси асосида жисмоний шахслардан олинадиган даромад солиғини тўлаш.

Йиллик умумий даромад декларацияси асосида жисмоний шахслардан олинадиган даромад солиғини тўлаш тартибини танлаган якка тартибдаги тадбиркорнинг даромадига 12 фоиз миқдорида солиқ солинади.

Йиллик умумий даромад декларацияси асосида жисмоний шахслардан олинадиган даромад солиғини тўлаш тартибини танлаган якка тартибдаги тадбиркорлар тадбиркорлик фаолиятини амалга ошириш билан боғлиқ бўлган ҳақиқатдан амалга оширилган ва ҳужжатлаштирилган харажатларни даромаддан ушлаб қолиш ҳуқуқига эга.

Солиқ ҳар ой даромад олинган ойдан кейинги ойнинг ўн бешинчи кунигача тўланади, бунга қуйидагилар асосланади:

- тақдим этилган дастлабки декларация;
- солиқ органининг хабарномаси.

Дастлабки декларация жорий йилнинг 1 февралидан кечиктирмай тақдим этилади. Янги рўйхатдан ўтган тадбиркорлик субъектлари дастлабки декларацияни хўжалик юритувчи субъектни давлат рўйхатидан ўтказиладиган ойнинг охиригача топширадилар. Йил сўнгида йиллик солиқ суммаси олинган ҳақиқий даромадга кўра ҳисобланади. Декларация доимий яшаш жойидаги солиқ органига ҳисобот йилидан кейинги йилнинг 1 апрелидан кечиктирмай топширилади. Декларация бўйича солиқ суммаси билан йил давомида тўланган суммалар ўртасидаги фарқ солиқ тўловчидан ундирилади ёки кейинги йилнинг 1 июнидан кечиктирмай унга қайтарилади.

3) ЖШДСни қатъий белгиланган миқдорда тўлаш.

Якка тартибдаги тадбиркорларнинг фаолият турлари бўйича 2020 йил учун ЖШДСнинг қатъий белгиланган суммалари “Ўзбекистон Республикасининг 2020 йилги Давлат бюджети тўғрисида”ги 2019 йил 9 декабрдаги ЎРҚ-589-сонли Қонуни билан тасдиқланган (13-илова).

Қатъий белгиланган солиқ суммаси ҳар ойда, тадбиркорлик фаолияти олиб борилган ойнинг ўн бешинчи кунидан кечиктирмай тўланади.

Бир нечта фаолият турлари билан шуғулланувчи солиқ тўловчилар ҳар бир фаолият тури учун солиқ суммасини ушбу фаолият турлари учун белгиланган миқдорда тўлашади. Якка тартибдаги тадбиркорлар юридик шахсни ташкил этмасдан шуғулланиши мумкин бўлган фаолият турлари рўйхати Ўзбекистон Республикаси Вазирлар Маҳкамасининг 2011 йил 7 январдаги 6 - сон қарорига 1-иловада келтирилган.

Жисмоний шахслар даромадларининг бошқа турлари билан бир қаторда, қатъий белгиланган миқдордаги солиқ тўлаш амалга ошириладиган фаолиятдан олинган даромадлари учун алоҳида ҳисоб юритилади. Ушбу даромадлардан олинадиган солиқ йиллик умумий даромад тўғрисидаги декларация асосида тўланади.

4) Якка тартибдаги тадбиркорнинг бошқа даромадларидан ЖШДС тўлаш.

жисмоний шахслардан олинадиган даромад солиғи қуйидаги даромад турлари бўйича йиллик умумий даромадлар тўғрисидаги декларация асосида тўланади:

- а) 12 % ставкада:
 - солиқ агентидан солиқ солинмайдиган мулкӣ даромадлар;
 - солиқ агентидан солиқ солинмайдиган моддий наф тарзидаги даромадлар;

Ўзбекистон Республикасидан ташқаридаги манбалардан олинган даромадлар;

солиқ агенти бўлмаган манбалардан олинган даромадлар.

б) илм-фан, адабиёт ва санъат асарларини яратганлик ва ундан фойдаланганлик учун олинган жисмоний шахсларнинг даромадлари ижодий фаолиятни амалга ошириш билан боғлиқ бўлган ва ҳужжатлаштирилган ҳақиқий харажатларни чегириб ташлаш ҳуқуқи билан 12 фоизлик ставка бўйича даромад солиғи солинади, аммо олинган ялпи даромад суммасининг 30 фоизидан кўп бўлмаган миқдорда.

в) дивиденд ва фоизлар кўринишидаги даромадларга 5% ставкада солиқ солинади.

5) Якка тартибдаги тадбиркорнинг даромадлар ва харажатларни ҳисобга олиш мажбурияти.

Якка тартибдаги тадбиркорлар тасдиқланган шаклларда даромад олиш билан боғлиқ даромадлар ва харажатларни ҳисобга олишлари шарт. Савдо фаолияти бўйича солиқ солинадиган даромадлар ва товар операцияларини ҳисобга олиш даромадлар ва амалга оширилган товар операциялари ҳисобини юритиш реестрларида юритилади. Улар:

а) чакана савдо билан шуғулланадиган якка тартибдаги тадбиркорнинг солиқ солинадиган даромадлари ва товар операцияларини ҳисобга олиш китоби;

б) маҳсулот чеклари китоби.

Якка тартибдаги тадбиркорнинг аризаси асосида якка тартибдаги тадбиркорнинг солиқ ҳисобини олиб бориш жойидаги солиқ хизмати органи даромадлар ва товар операциялари ҳисобини юритиш реестрларини рўйхатдан ўтказди. Улар якка тартибдаги тадбиркорда маълумот охириги киритилган кундан бошлаб беш йил давомида сақланади ва рақамланган, ип билан боғланган ва тегишли солиқ органининг муҳри билан тасдиқланган бўлиши керак.

Якка тартибдаги тадбиркорнинг фаолияти тўғрисидаги ҳисоботлар ҳар чорак якунлари бўйича солиқ ҳисоботини юритиш жойидаги солиқ органларига ҳисобот чорагидан кейинги ойнанинг ўнинчи кунидан кечиктирмай тақдим этилади.

4. Ижтимоий солиқ бўйича:

4.1. Грантлар ҳисобидан олиннадиган иш ҳақи кўринишидаги даромадлар, шунингдек, бошқарув ходимлари сифатида жалб қилинган акциядорлик жамиятларининг чет эллик ишчиларга бериладиган имтиёзлар бекор қилинмоқда.

4.2. Ижтимоий солиқ ставкаси давлат корхоналарига, устав фондида давлат улуши 50 фоиз ва ундан ортиқ бўлган юридик шахсларга, шунингдек

устав фондида 50 ёки ундан ортиқ фоиз давлат улуши бўлган юридик шахсларга ва уларнинг таркибий бўлинмаларига нисбатан 25 фоиздан 12 фоизгача пасайтирилди.

4.3. Жисмоний шахсларнинг алоҳида тоифаси учун энг кам иш ҳақининг каррали миқдорларида ўрнатилган қатъий белгиланган солиқ ставкалари базавий ҳисоблаш миқдоридан келиб чиққан ҳолда қайта кўриб чиқилади.

Жисмоний шахсларнинг кўрсатилган тоифасига жисмоний шахсларга декларация асосида йиллик даромадидан ижтимоий солиқни умумбелгиланган ставкада жисмоний шахслар даромад солиғига ўхшаш ҳолда тўлаш ҳуқуқи берилади.

4.4. Ижтимоий солиқни йиллик ялпи даромад тўғрисидаги декларация асосида ихтиёрий асосда ҳисоблашга тўлаш тартиби назарда тутилмоқда.

5. Айланмадан олинадиган солиқ бўйича:

5.1 Ягона ер солиғини бекор қилиш ва солиқ тўловчиларнинг алоҳида тоифаси учун ҚҚСни мажбурий тўлаш киритилишини ҳисобга олган ҳолда, айланмадан солиққа тортилмайдиган шахслар рўйхати қайта кўриб чиқилмоқда. Шу сабабли, қуйидаги шахслар айланмадан олинадиган солиқни қўллашга ҳақли эмаслар:

солиқ даврида товарлар (хизматлар) сотишдан олинган даромадлари 1 миллиард сўмдан ошган амалдаги юридик шахслар ва якка тартибдаги тадбиркорлар;

солиқ даврида товарлар (хизматлар) сотишдан олинган даромадлари 100 миллион сўмдан ошмаган якка тартибдаги тадбиркорлар;

товарларни импорт қилувчилар - импорт шартномаси тузилгандан кейинги ойнинг биринчи кунидан бошлаб;

акциз тўланадиган товарлар (хизматлар) ишлаб чиқарувчилар ва (ёки) фойдали қазилмалар қазиб олиш билан шуғулланувчилар;

50 гектар ва ундан ортиқ суғориладиган ер майдонлари бўлган қишлоқ хўжалиги ишлаб чиқарувчилари - қишлоқ хўжалиги ерлари олинган кундан кейинги ойнинг биринчи кунидан бошлаб;

бензин, дизель ёқилғиси ва газни реализация қиладиган юридик шахслар - ушбу фаолият бошланганидан кейинги ойнинг биринчи кунидан бошлаб;

лотереяни ташкил этиш фаолияти билан шуғулланувчи юридик шахслар;

оддий шериклик шартномаси доирасидаги фаолият бўйича ишончли вакиллар;

Инвестиция лойиҳасини амалга оширилмаганлиги тўғрисида хулоса бериш ваколатига эга орган томонидан хулоса чиқарилган тугалланмаган қурилиш объектлари ва фойдаланилмаётган ишлаб чиқариш майдонлари

эгалари. Улар қўшилган қиймат солиғи ва фойда солиғини хулоса чиқарилган ойдан кейинги ойнинг биринчи кунидан бошлаб тўлашга ўтишлари шарт;

марказлаштирилган молиялаштириш манбалари ҳисобидан объектлар қурилиш ишларини бажарувчи корхоналар (жорий таъмирлаш ва капитал таъмирлашдан ташқари). Улар бундай қурилиш шартномаси тузилган ойдан кейинги ойнинг биринчи кунидан бошлаб қўшилган қиймат ва фойда солиғини тўлашга ўтишга мажбурдирлар.

5.2. Айланмадан олинадиган солиқ тўлаш татбиқ қилинмайдиган шахслар 2020 йил 1 январдан бошлаб қўшилган қиймат солиғи ва фойда солиғи тўловчилари деб эътироф этилади. Бундай шахслар 2020 йил 1 февралга қадар солиқ органларини ушбу солиқларни тўлашга ўтиш тўғрисида хабардор қилишга мажбур.

Юқорида кўрсатилган муддатларда хабарнома тақдим қилинмаса солиқ органлари мустақил равишда ушбу шахсни қўшилган қиймат солиғи ва фойда солиғи тўловчиси сифатида бир вақтнинг ўзида қўшилган қиймат солиғи тўловчиси сифатида махсус ҳисобга олиш рўйхатдан ўтказишни амалга оширади.

Худди шундай қоидалар 2019 йилда тадбиркорлик субъекти сифатида рўйхатдан ўтган шахсларга нисбатан қўлланилади, уларнинг умумий даромади 2019 йил охирига қадар бир миллиард сўмга тенг бўлган суммадан ошиб, 365 га бўлинган ва рўйхатга олинган кундан бошлаб 2019 йил охиригача кунлар сонига кўпайтирилади.

5.3. Айланмадан солиқни қўллаш учун максимал йиллик айланмаси 1 млрд. сўм миқдорида сақланиб қолинди. Шу билан бирга, айланмадан олинадиган солиқни тўлашдан фойда солиғи ва ҚҚС тўлашга ўтиш тартиби батафсил баён этилган.

5.4. Узоқ технологик циклда - қурилишда, лойиҳалаш ва бошқа ишларда, агар тузилган шартномалар шартларида хизматларни босқичма-босқич топшириш кўзда тутилмаган бўлса, сотишдан тушган даромад тенг равишда тан олинади.

Ҳисобот даври охиридаги даромадни аниқлаш учун:

биринчи навбатда, контрактни бажаришни бошидан бошлаб қилинган харажатларнинг улуши шартномани бажариш харажатларининг умумий миқдорида ҳисобланади;

кейин олинган кўрсаткич контракт бўйича даромадининг умумий суммасига (контракт нархига) кўпайтирилади.

Жорий ҳисобот даври учун хизматларни реализация қилишдан олинган даромадни аниқлашда ушбу шартнома бўйича илгари ҳисобга олинган даромадлар чегириб ташланади.

5.5. 2019 йилда амалда бўлган айланмадан солиқ ставкалари сақланиб қолинмоқда, мол-мулкни ижарага бериш фаолияти бундан мустасно. Ушбу

фаолият тури бўйича солиқ ставкасини 30 фоиздан 8 фоизга тушириш назарда тутилмоқда.

Асосий фаолияти мол-мулкни ижарага бериш бўлмаган юридик шахслар мол-мулкни ижарага беришдан олинган даромадлар бўйича Солиқ кодексининг 467-моддаси 1-бандида белгиланган солиқ ставкасини қўллаган ҳолда айланмадан солиқни тўлайдилар.

5.6. Барча солиқ тўловчилар учун солиқ ҳисоботини тақдим этишнинг унификациялашган муддати белгиланмоқда:

ҳисобот давридан кейинги ойнинг 15-кунидан кечиктирмай - ҳисобот даври якунлари бўйича;

солиқ даври тугаган кейинги даврнинг 15 февралидан кечиктирмай - солиқ даври якунлари бўйича.

6. Юридик шахсларнинг мол-мулк солиғи бўйича:

6.1. Мол-мулк солиғини ҳисоблаб чиқариш ва тўлаш тартиби сақлаб қолинмоқда. Бунда Ўзбекистон Республикаси норезидентлари учун мол-мулк солиғини мустақил равишда ҳисоблаб чиқариш мажбурияти жорий этилмоқда.

6.2. Солиқ ставкаси 2 фоиз миқдорида сақлаб қолинмоқда, қурилиши норматив муддатда тугалланмаган объектларга нисбатан солиқ ставкаси 4 фоиз миқдорида белгиланмоқда.

Бунда бўш турган бинолар, фойдаланилмаётган ишлаб чиқариш майдонлари, нотурар-жой бинолар, шунингдек қурилиши тугалланмаган объектлар бўйича қонун ҳужжатларида оширилган солиқ ставкаларини белгилаш орқали чоралар қўлланилиши мумкин ва мол-мулк солиғи бўйича солиқ имтиёзлари уларга нисбатан татбиқ қилинмайди.

Қуйидаги кўчмас мулк объектларига нисбатан илгари берилган имтиёзлар ўрнига 0,2% миқдорида пасайтирилган солиқ ставкаси жорий этилмоқда:

умумий фойдаланишдаги темир йўллар, магистрал қувурлар, алоқа ва электр узатиш линиялари, шунингдек ушбу объектларнинг ажралмас технологик қисми бўлган иншоотлар;

Ўзбекистон Республикаси Вазирлар Маҳкамасининг консервация қилиш тўғрисида қарори қабул қилинган кўчмас мулк ва қурилиши тугалланмаган объектлар.

6.3. Ўз вақтида ишга туширилмаган ускуналар солиқ солиш объектидан чиқариб ташланмоқда.

Қурилиш ташкилотларининг ёки қурувчиларнинг балансида уларни кейинчалик сотиш учун ҳисобида турган кўчмас мулк объектлари ушбу объектлар фойдаланишга топширилгандан бошлаб олти ой ўтгандан сўнг солиқ солиш объектига киритилмоқда. Улар бўйича солиқ базаси ушбу

объектларнинг ўртача йиллик қийматидан (реализация қилинмаган қисмидан) келиб чиқиб аниқланади.

6.4. Тўлиқ амортизация қилинган биноларга ҳар уч йилда бир мартадан кўп бўлмаган қайта баҳоланган (бозор) қийматидан келиб чиқиб мол-мулк солиғи солиниши белгиланмоқда.

6.5. Қишлоқ хўжалиги маҳсулотларини ишлаб чиқариш ва сақлаш учун ишлатиладиган, қишлоқ хўжалиги корхоналари балансидаги мол-мулкнинг ўртача йиллик қолдиқ қийматига солиқ солинадиган базани камайтириш кўринишида мол-мулк солиғи бўйича имтиёз жорий этилмоқда.

6.6. Солиқ ҳисоботи солиқ ҳисоботини юритиш жойидаги солиқ органига йилига бир марта йиллик молиявий ҳисоботни тақдим этиш пайтида юридик шахслар - Ўзбекистон Республикаси норезидентлари томонидан эса ҳисобот давридан кейинги йилнинг 15 февралигача тақдим этилади.

Агар кўчмас мулк (умумий фойдаланишдаги темир йўллар, магистрал қувурлар, алоқа линиялари ва электр узатиш линиялари бундан мустасно) солиқ тўловчининг солиқни рўйхатдан ўтказиш жойида жойлашган бўлмаса, солиқ ҳисоботи кўчмас мулк жойлашган жой бўйича солиқ органларига тақдим этилади.

6.8. Аванс тўловлари миқдорини ҳисоблаш тўғрисидаги маълумотнома солиқ органларига жорий солиқ даврининг 10 январигача, янги ташкил этилганлар эса давлат рўйхатидан ўтказилган кундан бошлаб ўттиз кундан кечиктирмай тақдим этилади.

Қуйидагилар томонидан аванс тўловлари тўланади:

айланмадан олинадиган солиқ тўловчилари томонидан - ҳар чоракнинг учинчи ойининг 10-кунидан кечиктирмай йиллик солиқ суммасининг тўртдан бир қисми миқдорида;

айланмадан олинадиган солиқ тўловчилари бўлмаган солиқ тўловчилар томонидан - ҳар ойнинг 10-кунидан кечиктирмай йиллик солиқ суммасининг ўн иккидан бир қисми миқдорида.

Аванс тўловлари Ўзбекистон Республикасида доимий муассасалар орқали фаолиятни амалга оширмайдиган Ўзбекистон Республикасининг норезидентлари бўлган юридик шахслар томонидан тўланмайди.

Аванс тўловларини ҳисобга олган ҳолда солиқ даври учун тўланиши лозим бўлган солиқ суммаси бюджетга солиқ ҳисоботини топшириш муддатидан кечиктирмай тўланади.

Ўз фаолиятини Ўзбекистон Республикасида доимий муассаса орқали амалга оширмайдиган Ўзбекистон Республикаси норезидентлари солиқни йилига бир марта ҳисобот давридан кейинги йилнинг 15 февралидан кечиктирмай тўлайдилар.

7. Жисмоний шахсларнинг мол-мулкига солинадиган солиқ бўйича:

7.1. Жисмоний шахсларнинг мол-мулкига солинадиган солиқни ҳисоблаш ва тўлаш тартиби сақланади. Бунда, солиқ янги бинолар, жойлар ва иншоотларга мулк ҳуқуқи пайдо бўлган ойдан бошлаб тўланади.

7.2. Солиқ ставкалари 2019 йил даражасида сақлаб қолинди.

Бунда 2020 йилда жисмоний шахсларнинг мол-мулкига солинадиган солиқни ҳисоблаб чиқаришда, кадастр қийматидан солиқ суммаси 2019 йил учун ҳисобланган солиқ миқдоридан 30 фоиздан кўпга ошмаслиги керак.

7.3. Солиқ органи томонидан солиқ тўловчиларга тўловларни тўлаш тўғрисида билдиришнома тақдим этиш муддати 1 мартдан кечиктирмай белгиланади.

7.4. Солиқни тўлаш муддати йилига икки марта 15 апрель ва 15 октябргача тенг улушларга бўлиб белгиланди.

8. Юридик шахслардан олинадиган ер солиғи бўйича:

8.1. Қишлоқ хўжалигига мўлжалланмаган ерлар бўйича юридик шахслардан олинадиган ер солиғини ҳисоблаш ва тўлаш тартиби сақлаб қолинмоқда.

Қишлоқ хўжалигига мўлжалланган ерлар бўйича қонун ҳужжатларига мувофиқ аниқланадиган қишлоқ хўжалигига мўлжалланган ерларнинг норматив қийматидан келиб чиққан ҳолда солиқни ҳисоблаш тартиби жорий этилади. Бунда мева-сабзавот маҳсулотлари етиштирувчи қишлоқ хўжалиги корхоналари учун мева-сабзавот маҳсулотлари билан банд бўлган ерлар учун солиқни суғориладиган ва суғорилмайдиган қишлоқ хўжалиги ерлари учун ер солиғининг базавий солиқ ставкаси ва ернинг сифат хусусиятларини ҳисобга оладиган тузатиш коэффициентидан келиб чиқиб ҳисоблаб чиқариш тартиби сақланади (балл-бонитет).

8.2. 2020 йил учун қишлоқ хўжалигига мўлжалланмаган ерлар учун солиқ ставкалари, шунингдек мева-сабзавот қишлоқ хўжалиги корхоналаридан ундириладиган ер солиғи ставкалари “Ўзбекистон Республикасининг 2020 йил учун Давлат бюджети тўғрисида”ги Ўзбекистон Республикасининг 2019 йил 9 декабрдаги ЎРҚ-589-сонли Қонуни билан тасдиқланган.

Қишлоқ хўжалиги ерлари учун солиқ ставкаси қишлоқ хўжалигига мўлжалланган ерларнинг норматив қийматидан 0,95 фоиз миқдорида белгиланади.

Қурилиши тугалланмаган ер участкалари учун, агар қонун ҳужжатларида бошқача тартиб назарда тутилмаган бўлса, солиқ икки баравар солиқ ставкалари бўйича тўланади.

Бўш турган бинолар, фойдаланилмаётган ишлаб чиқариш объектлари, турар-жой бўлмаган бинолар, шунингдек қурилиши тугалланмаган қурилиш майдонларига нисбатан қонун ҳужжатларида солиқ ставкаларини белгилаш

орқали таъсир чоралари қўлланилиши мумкин ва солиқ имтиёзлари уларга нисбатан қўлланилмайди.

8.3. Қуйидагилар билан банд бўлган ер участкалари учун солиқ ставкаларига 0,1 коэффиценти қўлланилади:

ногиронларнинг жамоат бирлашмалари ягона иштирокчилари бўлган ва уларнинг умумий сонидан ногиронлар камида 50 фоизни ташкил этадиган ҳамда ногиронларнинг иш ҳақи жамғармаси умумий иш ҳақининг камида 50 фоизини ташкил этадиган юридик шахслар;

электр узатиш линиялари, подстанциялар ва улардаги қурилмалар;

умумдавлат алоқа линиялари (ҳаво ва кабелли алоқа линиялари, тиргакли линиялар ва радиофикациялар, ер ости кабелли линиялари, уларни билдирувчи сигналли ва ҳаракатсиз белгилар, радиореле алоқа линиялари, кабелли телефон канализациялари, ер устидаги ва ер остидаги хизмат кўрсатилмайдиган кучайтиргич пунктлари, тақсимлагич шкафлар, ерга улаш контури қутилари ҳамда бошқа алоқа иншоотлари) эгаллаган ерлар;

умумий фойдаланишдаги темир йўллар, шу жумладан тупроқ кўтармаси, сунъий иншоотлар, линия-йўл бинолари, темир йўл алоқаси ҳамда электр таъминоти қурилмалари, иншоотлар ва йўл қурилмаларидан иборат темир йўллар станциялари ҳамда саралаш жойлари, шунингдек белгиланган тартибда темир йўл транспорти корхоналари, муассасалари ва ташкилотларига доимий ёки вақтинчалик фойдаланишга берилган ихота дарахтзорлари эгаллаган ерлар;

магистрал нефть ва газ қувурлари, шу жумладан компрессор, насос станциялари, ёнғинга қарши ва аварияга қарши станциялар, трубопроводларни катодли ҳимоялаш станциялари уларни тармоққа улаш узеллари билан, трубопроводларни тозалаш қурилмалари ҳамда шунга ўхшаш иншоотлар эгаллаган ерлар;

самолётларнинг учиш-қўниш майдонлари, ерда бошқариш йўлкалари ва тўхташ жойлари, фуқаро авиацияси аэропортларининг радионавигация ва электр-ёритиш ускуналари эгаллаган ерлар;

Ўзбекистон Республикасининг ривожланиш давлат дастурларига киритилган объектлар қурилиши учун ажратилган ерлар, норматив қурилиш муддати даврида; консервацияга қўйилиши тўғрисида Ўзбекистон Республикаси Вазирлар Маҳкамасининг қарорлари қабул қилинган объектлар эгаллаган ерлар, уларнинг консервацияси даврида.

Солиқ ставкаларига 0,1 коэффиценти илгари берилган имтиёзларнинг ўрнига киритилиб, белгиланган тартибда юридик шахсларга берилган ер участкаларига нисбатан қўлланилади.

8.4. Қишлоқ хўжалиги ерларининг сифати яхшиланган (балл-бонитети ошганида) тақдирда, солиқ юридик шахслар томонидан қишлоқ хўжалиги ерларининг норматив қийматидан янги балл бонитетидан тупроқнинг бонитировкалаш бўйича ишларни ўтказишдан кейинги йилнинг бошидан бошлаб агротехник тадбирлар тугалланган даврлар учун қайта ҳисобламасдан янги балл-бонитетдан келиб чиқиб тўланади.

8.5. Солиқ ҳисоботи ер участкаси жойлашган жойдаги солиқ органига тақдим этилади:

қишлоқ хўжалигига мўлжалланмаган ерлар учун - жорий солиқ даврининг 10 январигача;

қишлоқ хўжалигига мўлжалланган ерлар учун - жорий солиқ даврининг 1 майгача.

8.6. Солиқ солинмайдиган ер участкалари бўлган юридик шахслар ушбу объектларнинг жойлашган жойидаги солиқ органларига жорий солиқ даврининг 10 январига қадар Ўзбекистон Республикаси Давлат солиқ кўмитаси томонидан тасдиқланган шаклда маълумотнома тақдим этишлари шарт.

8.6. Қишлоқ хўжалигига мўлжалланмаган ерлар учун солиқ қуйидаги тартибда тўланади:

Айланмадан олинадиган солиқни тўловчилар - ҳар чорак биринчи ойининг 10-санасига қадар йиллик солиқ суммасининг тўртдан бир қисми миқдорида;

айланмадан олинадиган солиқни тўловчилари бўлмаган солиқ тўловчилар - ҳар ойнинг 10-санасига қадар йиллик солиқ суммасининг ўн иккидан бир қисми миқдорида.

Қишлоқ хўжалигига мўлжалланган ерлар учун солиқни тўлаш қуйидаги тартибда амалга оширилади:

ҳисобот йилининг 1 сентябрига қадар – йиллик солиқ суммасининг 30 фоизи;

ҳисобот йилининг 1 декабрига қадар – солиқнинг қолган суммаси.

9. Жисмоний шахслардан олинадиган ер солиғи бўйича:

9.1. Жисмоний шахслардан олинадиган ер солиғини ҳисоблаб чиқариш ва тўлаш тартиби сақлаб қолинмоқда.

9.2. Солиқ органлари томонидан солиқ тўловчиларга солиқни тўлаш тўғрисидаги тўлов хабарномасини тақдим этиш муддати 1 мартдан кечиктирмай белгиланади.

9.3. Солиқни тўлаш муддати йилига икки марта 15 апрель ва 15 октябргача тенг улушларга бўлиб белгиланди.

10. Сув ресурсларидан фойдаланганлик учун солиқ бўйича:

10.1. Сув ресурсларидан фойдаланганлик учун солиқни ҳисоблаб чиқариш ва тўлаш тартиби сақлаб қолинмоқда.

10.2. Сув ресурсларидан фойдаланганлик учун солиқ ставкалари 2020 йил учун 2019 йил 9 декабрдаги “2020 йил учун Ўзбекистон Республикасининг Давлат бюджети тўғрисида”ги ЎРҚ-589-сонли Ўзбекистон Республикаси Қонунининг 11-илоvasи билан тасдиқланган.

2020 йил 1 январдан бошлаб алкоголь маҳсулотларини (пиво ва винодан ташқари) ишлаб чиқарувчи корхоналар учун алкоголь маҳсулотларини (пиво ва винодан ташқари) ишлаб чиқариш учун фойдаланиладиган сув ҳажми бўйича 1 куб метр учун 21 900 сўм миқдорида, бошқа мақсадлар учун эса ер усти сув ресурслари манбалари бўйича 1 куб метр учун 410 сўм ҳамда ер ости

сув ресурслари манбалари бўйича 1 куб метр учун 490 сўм миқдорда белгиланмоқда.

Алкоголь маҳсулотларини ишлаб чиқарувчи юридик шахслар учун алкогольли маҳсулот ишлаб чиқариш ва бошқа мақсадлар учун фойдаланилган сувнинг ҳажми солиқ базаси ҳисобланади. Алкогольли маҳсулотлар ишлаб чиқариш учун фойдаланиладиган сув ҳажми деганда истеъмол идишидаги тайёр маҳсулотга тўғри келадиган сувнинг ҳажми тушунилади.

Алкоголсиз ичимликлар ишлаб чиқарувчи корхоналар сув ресурсларидан фойдаланганлик учун солиқ бўйича бўнак тўловлар суммаси тўғрисидаги маълумотнома шакли тасдиқлангунга қадар 2020 йил 20 январгача сув ресурсларидан фойдаланганлик учун солиқ бўйича сувдан фойдаланиш ёки сувни истеъмол қилиш жойидаги солиқ органларига сув ресурсларидан фойдаланганлик учун солиқ бўйича бўнак тўловларини ҳисоблаб чиқариш учун ушбу қўшма хат иловасига мувофиқ шакл бўйича маълумотнома тақдим этадилар.

Қуйидаги ҳолларда оширилган солиқ ставкалари ўрнатилади (белгиланган солиқ ставкаларининг беш бараваридан):

сувдан фойдаланиш учун белгиланган лимитлардан ортиқча сув олинганда (бундай ортиқча қисм бўйича);

сув ресурсларидан рухсат берувчи ҳужжатларсиз фойдаланилганда;

автотранспорт воситаларини ювишни амалга оширувчи корхоналар томонидан ер усти манбаларидан олинган сувдан фойдаланилганда.

10.3. Солиқ ҳисоботини тақдим этиш муддатлари кўплаб солиқ тўловчилар учун сақлаб қолинмоқда.

Ўзбекистон Республикасида фаолиятини доимий муассасалар орқали амалга ошираётган Ўзбекистон Республикасининг норезидентлари бўлган юридик шахслар, шунингдек яққа тартибдаги тадбиркорлар учун – солиқ давридан кейинги йилнинг 20 январигача.

10.4. Сувдан фойдаланиш ёки сувни истеъмол қилиш жойидаги солиқ органларига солиқ бўйича бўнак тўловлар миқдорини ҳисоблаб чиқариш учун маълумотномани тақдим этиш муддати сақлаб қолинмоқда.

Бунда бўнак тўловлар:

солиқ даврида солиқ суммаси базавий ҳисоблаш миқдорининг икки юз бараваридан кўпроқни ташкил этадиган юридик шахслар томонидан (бундан айланмадан олинмаган солиқни тўловчилар мустасно) – ҳар ойнинг 20 санасидан кечиктирмай йиллик солиқ суммасининг ўн иккидан бир қисми миқдорда;

солиқ даврида солиқ суммаси базавий ҳисоблаш миқдорининг икки юз бараваридан камроқни ташкил этадиган, айланмадан олинмаган солиқни тўловчилар бўлмаган юридик шахслар, шунингдек айланмадан олинмаган

солиқни тўловчилар ва яқка тартибдаги тадбиркорлар томонидан – ҳар чорак учинчи ойининг 20 санасидан кечиктирмай йиллик солиқ суммасининг тўртдан бир қисми миқдорида тўланади.

Солиқ даври учун бўнак тўловлар ҳисобга олинган ҳолда солиқни тўлаш солиқ тўловчилар томонидан, бундан деҳқон хўжаликлари мустасно, сувдан фойдаланиш ёки сув истеъмоли жойида, солиқ ҳисоботи тақдим этиладиган муддатдан кечиктирмай амалга оширилади.

Деҳқон хўжаликлари томонидан солиқни тўлаш йилда бир марта, солиқ давридан кейинги йилнинг 1 майгача амалга оширилади.

11. Ер қаъридан фойдаланганлик учун солиқ бўйича:

11.1. Ер қаъридан фойдаланганлик учун солиқни ҳисоблаб чиқариш ва тўлаш тартиби сақлаб қолинмоқда.

11.2. Қазиб олинган (ажратиб олинган) фойдали қазилманинг ҳажми фойдали қазилмаларнинг ҳақиқий йўқотишларини ҳисобга олган ҳолда аниқланади. Фойдали қазилманинг захираси қайси фойдали қазилманинг миқдорида камайтириладиган бўлса, ўша фойдали қазилманинг ҳисобланган миқдори ва фойдали қазилмани қазиб олишнинг (ажратиб олишнинг) тўлиқ технологик цикли яқунлангач аниқланган, ҳақиқатда қазиб олинган (ажратиб олинган) фойдали қазилма миқдори ўртасидаги фарқ фойдали қазилманинг ҳақиқий йўқотишларидир.

11.3. Солиқ базаси ишлаб чиқариш таннархини 20 фоизга оширган ҳолда аниқланади.

11.4. Қазиб олинган фойдали қазилмаларнинг бир қисмини сотишда ишлаб чиқариш таннархи, фойдали қазилмаларнинг бошқа қисми эса бошқа тайёр маҳсулотни ишлаб чиқариш учун хом ашё ҳисобланиши ёки ўзининг ишлаб чиқариш ёхуд хўжалик эҳтиёжлари учун ишлатилиши асосида солиқ базасини аниқлаш тартиби бекор қилинди ҳамда ушбу фойдали қазилмага солиқ базасини аниқлаш тартиби қазиб олинган фойдали қазилмаларнинг бутун ҳажмига ҳисоблаб чиқарилган фойдали қазилманинг ўртача сотиш баҳоси асосида аниқланади.

11.5. Солиқ ставкалари Солиқ кодекси билан белгиланган. Фойдали қазилмалар рўйхати янги Ўзбекистон Республикаси ҳудудида аниқланган фойдали қазилмалар (рений, селен, теллур, индий, висмут, палладий, йод, марганец рудалари ва бошқалар) билан тўлдирилган.

Фойдали қазилмаларни қазиб олишда фойдали қазилмаларнинг норматив йўқотишларига тааллуқли қисми бўйича 0 фоизли ставка жорий этилмоқда. Фойдали қазилмаларни қазиб олишда (ажратиб олишда) конларда фойдали қазилмаларни қазиб олишнинг қабул қилинган схемаси ва технологиялари билан технологик боғлиқ ҳолдаги, ваколатли орган томонидан қонун ҳужжатларда белгиланган тартибда тасдиқланадиган нормалар доирасидаги йўқотишлар норматив йўқотишлардир.

Солиқ ставкалари белгиланадиган, лекин бир тонна учун қатъий белгиланган солиқ суммасидан кам бўлмаган фойдали қазилмаларнинг айрим турлари куб метрга ўтказилади.

Мутлоқ суммада белгиланган (хусусан, тош (овқатга ишлатиладиган) туз, оҳактош доломитлар, мрамор ушоғи, ғишт-черепица хом ашёси, қурилиш кумлари ва бошқалар) амалдаги солиқ ставкалари 15 фоизга индексация қилинди.

Фойдали қазилмаларнинг айрим турлари учун қатъий белгиланган ставкалардан кам бўлмаган миқдорда (табiiй безактошдан блоклар, тош-шағал аралашмаси, оҳактош-чиғаноқ, кумтош ва бошқалар) белгиланган ставкалардан келиб чиқиб солиқларни ҳисоблаб чиқариш ва тўлаш тартиби белгиланди.

Цемент ишлаб чиқариш учун оҳактош бўйича солиқ ставкаси 1 тонна учун 45 минг сўм миқдорида сақлаб қолинди, цементни ишлаб чиқариш учун кўмирдан фойдаланадиган ишлаб чиқарувчи корхоналар учун эса цементни ишлаб чиқариш учун оҳактош бўйича солиқ ставкаси 50 фоизга камайтирилди.

Қимматбаҳо, рангли, нодир ва радиоактив металлларни қазиб олиш билан шуғулланувчи айрим солиқ тўловчилар учун Ўзбекистон Республикаси Президенти томонидан оширилган солиқ ставкалари белгиланиши мумкин.

11.6. Юридик шахслар учун ҳисобот даври бир ой этиб белгиланган.

11.7. Солиқ ҳисоботи солиқ ҳисобида турган жойдаги, норуда фойдали қазилмалар бўйича эса – қазиб олиш амалга оширилган жойдаги солиқ органларига қуйидаги муддатларда тақдим этилади:

юридик шахслар томонидан – ортиб борувчи якун билан ҳар ойда, ҳисобот давридан кейинги ойнинг 20-санасидан кечиктирмай, йил якунлари бўйича эса – йиллик молиявий ҳисобот тақдим этиладиган муддатда;

жисмоний шахслар томонидан – йилда бир марта, солиқ давридан кейинги йилнинг 1 февралидан кечиктирмай.

Солиқни тўлаш қуйидагича амалга оширилади:

юридик шахслар томонидан – ҳар ойда кейинги ойнинг 20-санасидан кечиктирмай, йил якунлари бўйича эса – йиллик молиявий ҳисобот тақдим этиладиган муддатдан кечиктирмай;

жисмоний шахслар томонидан – солиқ ҳисоботини тақдим этиш муддатидан кечиктирмай.

11.8. Қўшимча фойда солиғи бекор қилинди.

12. Солиқ тўловчиларнинг айрим тоифалари учун солиқ солишнинг ўзига хос хусусиятлари

Солиқ кодексида қуйидагилар кўзда тутилган:

12.1. Тўғридан-тўғри хусусий хорижий инвестициялар иштирокидаги юридик шахсларга солиқ солишнинг ўзига хос хусусиятлари, бунда

белгиланган юридик шахсларга солиқ солиш шартлари ва уларнинг солиқ имтиёзларидан фойдаланиш тартиби кўзда тутилган.

Тўғридан-тўғри хусусий хорижий инвестицияларни жалб қилган ҳолда ташкил этилган ва рўйхат асосида иқтисодиёт тармоқларида маҳсулот ишлаб чиқариш (хизмат кўрсатиш)га ихтисослашган юридик шахслар, Ўзбекистон Республикаси Президентининг қарори билан белгиланган муддатга, киритган тўғридан-тўғри хорижий инвестицияларнинг ҳажмидан келиб чиқиб, ер солиғи, мол-мулк солиғи ва сув ресурсларидан фойдаланганлик учун солиқларни тўлашдан озод этилган.

12.2. Махсус иқтисодий зоналар иштирокчиларига солиқ солишнинг ўзига хос хусусиятлари, бунда уларни солиққа тортишнинг шартлари ва уларнинг солиқ имтиёзларидан фойдаланиш тартиблари кўзда тутилган.

Махсус иқтисодий зоналар иштирокчилари Ўзбекистон Республикаси Президентининг қарори билан белгиланган муддатга, киритган хорижий инвестицияларининг ҳажмидан келиб чиқиб, ер солиғи, мол-мулк солиғи ва сув ресурсларидан фойдаланганлик учун солиқларни тўлашдан озод этилган.

Махсус иқтисодий зоналар иштирокчилари Солиқ кодексига мувофиқ қўшилган қиймат солиғи ва бошқа солиқлар бўйича имтиёзлардан фойдаланиши мумкин.

12.3. Маҳсулот тақсимоти бўйича битим доирасида амалга ошириладиган фаолиятни солиққа тортишнинг ўзига хос хусусиятлари.

Хорижий инвесторлар учун маҳсулот тақсимоти бўйича битимнинг амал қилиш муддати давомида қўшилган қиймат солиғини тўлаш жорий қилинмоқда. Мазкур норма 2020 йилнинг 1 январидан кейин тузилган маҳсулот тақсимоти тўғрисидаги битимларга нисбатан қўлланилади.

12.4. Адвокатлар коллегияси, адвокатлик фирмалари, адвокатлик бюрolari ва адвокатларга солиқ солишнинг ўзига хос хусусиятлари сақланиб қолинмоқда.

12.5. Хусусий амалиёт билан шуғулланадиган нотариусларга солиқ солишнинг ўзига хос хусусияти жорий этилмоқда. Бунда хусусий амалиёт билан шуғулланувчи нотариуслар меҳнатга ҳақ тўлаш тарзида олинадиган даромадлар қисмида белгиланган ставкалар бўйича ижтимоий солиқ ва жисмоний шахслардан олинадиган даромад солиғини тўлашни назарда тутди.

Хусусий амалиёт билан шуғулланувчи нотариус зиммасига ходимларнинг меҳнатига ҳақ тўлаш қисмида жисмоний шахслардан олинадиган даромад солиғини ва ижтимоий солиқни ҳисоблаб чиқариш ҳамда тўлаш мажбурияти юклатилади.

Хусусий амалиёт билан шуғулланувчи нотариуслар нотариал хизматлар кўрсатиш бўйича қўшилган қиймат солиғини тўлашдан озод этилади.

Хусусий амалиёт билан шуғулланувчи нотариуслар фойда солиғини Солиқ кодексига белгиланган ставка бўйича тўлайди. Бунда фойда солиғини

ҳисоблаб чиқариш, солиқ ҳисоботларини тақдим этиш ва тўлаш йилига бир марта, ҳисобот давридан кейинги йилнинг 1 мартидан кечиктирмай амалга оширилади.

Фойда солиғини ҳисоблаб чиқаришда Солиқкодексининг 43-бобида назарда тутилган даромадларнинг барча турлари хусусий амалиёт билан шуғулланувчи нотариусларнинг даромадлари деб эътироф этилади.

Нотариал фаолиятни амалга ошириш билан боғлиқ харажатлар чегириладиган харажатлар жумласига киритилади. Бунда чегирилмайдиган харажатлар ушбу Кодекснинг 317-моддасига мувофиқ аниқланади.

Фойда солиғи тўланганидан кейин хусусий амалиёт билан шуғулланувчи нотариуснинг тасарруфида қолган фойда солиқ солиш мақсадида дивидендларга тенглаштирилади.

Янги таҳрирдаги Ўзбекистон Республикаси Солиқ кодексининг моҳиятини мазкур хатда кўрсатилган асосий ўзгаришларга алоҳида эътибор берган ҳолда солиқ тўловчилар ва аҳолига етказилиши сўралади.

Вазир ўринбосари

Д. Султанов

Раиснинг
биринчи ўринбосари

М. Мирзаев